



Stòria e testimòngius de su tempus antigu

Is primas novas a pitzus de Solèminis funt de su de XI sèculus, ma podit èssiri chi su logu fessat bìviu giai finsas de su tempus romanu.

In totu su territòriu de Solèminis, unu de is prus saliosus de sa Sardigna de bàsciu, sa presèntzia umana ddoi fiat documentada gei de is tempus antigus, tantis chi su territòriu est prenu de testimòngius archeològicus.

Solèminis fiat parti de sa curadoria de su Partiddu, in su giudicau de Casteddu, ma candu a custu dd'iant sconciau, sa bidda fiat passada a su rènniu de Arborea finsas a su 1297, candu dd'iant donau a su comunu de Pisa. In su 1324, cun sa conchista aragonesa, dd'iant donau che fèudu a Arnaldo Ballester e pustis de medas passàgius de meri su fèudu dd'iant bèndiu a Calcerando Torrelas e a is fradis in su 1442, candu sa biddixedda fiat giai giai spèrdia totu.

In is primus dex'annus de su 1600 Solèminis fiat ancora sbuida, e candu s'est mortu s'ùrtimu meri suu est torrada a èssiri de sa Corona.

In su 1637 su territòriu, chi oramai fiat totu unu padenti, dd'iant bèndiu a Francesco Vico, chi si fiat mortu in su 1648 lassendi eredi a nebodi suu Francesco Zonza Vico. Issu iat torrau a prenni sa biddixedda de genti e in su 1651 iat arriciu su tìtulu de Marchesu de Solèminis. A dolu mannu

s'epidèmia de pesta de su 1652 ndi iat atradau is progetus, chi iat torrau a incarrerai unus cantus annus a pustis e iat acabau a intru de su 1678 po mori de is franchidadis meda chi iant bitiu a is terralis.

De is Zonza Vico, in su 1756, sa biddixedda fiat passada a is Amat e pustis dd'iant luia in su 1838.

Sa dominatzioni spanniola fiat acabada candu sa Sardigna dd'iant ocupada is Austrìacus in su 1708, ma su'apoderamentu austrìacu fiat sighiu pagu tempus. In su 1718 sa Sardigna fiat passada a is Savoia, su Piemonte no iat bogau de manera crara su feudalèsimu, ma iat scioberau de nci ddu bogai cunforma a sa lei fendi pagai totu custas fainas a is comunus e totu. Sa luitzioni de su fèudu dd'iant posta a 740 liras chi si depiant pagai cumintzendi de su 1840.

Candu in su 1848 iant sciusciau is provìntzias, Solèminis fiat intrada in sa spratzidura amministrativa de Casteddu e in su 1859 in cussa de sa provìntzia omònima chi iant torrau a cuncordai.

Po cussu chi pertocat su topònimu, ant pensau a teorias meda, chi perou no lompint a cumbinci in prenu. Sighendi cussa prus probàbbili, su nòmini iat a depi benni de su latinu "*sollemnis*", po nai unu logu chi dònna annu arricit una festa religiosa manna; un'atra ipòtesi probàbbili est cussa chi ddu bolit fai benni de Sol, su deus de su soli e Eminens, est a nai logu postu in artu, incàpas po amostai unu logu aundi si alabàt a cussa deidadi.

Su centru stòrigu de Solèminis allogat ancora fràigus antigus fatus cunforma a s'architettura de sartu cun su làdiri, e intre custus ddoi est sa domu "Corda Spada", furriada immoi in centru culturali. Custa allogat una arregòllida etnogràfica stravanada, paris cun trastus, ainas e manufatus de su donniadì sardu.

De interessu mannu, in su logu de Sedd'e crèsia, sa crèsia de Santu Giacu, una crèsia de su Sexentus chi fortzis ant pesau a pitzu de unu fràigu de su tempus mesuevali e chi allogat a intru testimòngius artisticus de primori.